



25 Maiu 2022

## Komunikadu Imprensa

### Kona ba Lei Opsaun Prinsipál sira Planu 2023

Horiseik, dia 24 fulan Maiu, ONG Lao Hamutuk hato'o Karta Aberta ida ba Deputadu/a Parlamentu Nasionál, kona-ba proposta **Lei Opsaun Prinsipál sira Planu 2023** (*Lei Grande Opsaun Planu*). Ho Karta ida ne'e, La'ó Hamutuk hakarak atu kontribui ba avaliasaun no diskusaun ba dezeńu direasaun Polítiku ida ne'ebé realístiku, ekitável no sustentável liu ba ita nian rain doben.

La'ó Hamutuk apresia katak liu husi proposta Lei Opsaun Prinsipál sira, Planu Governu esforsu atu hatudu realidade no situaun loloos husi finansas estadu, inklui fó projesaun katak Fundu Petrolíferu sei mamuk molok tinan 2035, no realidade reseita husi produsaun mina no gás nafatin hatudu tendénsia tun.

Iha Karta Aberta refere, La'ó Hamutuk husu Ministériu Finansas atu hadi'a no atualiza informasaun kona-ba projesaun ba despeza no reseita ba futuro. Ami nota katak Proposta Lei ida ne'e uza dadus financeiru ne'ebé la inklui impaktu husi Orsamentu Retifikativu 2022, ne'ebé aumenta OJE 2022 ba biliaun \$1.24. Iha ezbosu Lei nia laran, iha mós informasaun ne'ebé la konsistente, no ami preokupa katak projesaun ba reseita iha futuro inklui reseita la mai serteza, ka la iha evidénsia. Iha Karta Aberta ne'e, ami inklui informasaun kle'an tan kona ba preokupasaun hirak ne'e, no husu Ministériu Finansas atu fornese informasaun kompletu kona-ba sira nia estimasaun hirak ne'e, atu ajuda Membru Parlamentu no públiku bele avalia proposta ida ne'e, no komprende realidade situaun finansas estadu inklui impaktu husi proposta lei ida ne'e.

Maske La'ó Hamutuk apresia katak Lei Opsaun Prinsipál sira Planu kria oportunidade atu estabese planu integradu ne'ebé kontribui ba objetivu spesífiku, ami observa katak Proposta Lei ne'e sita medida 263. Ne'e signífika katak proposta lei ida ne'e falta atu identifika "Opsaun Prinsipál", maibé inklui lista medida barak la ho indikasaun medida ka programa saida mak sei hetan prioridade ka alokasaun boot liu. Iha Karta Aberta, ami identifika proposta programa ruma ne'ebé importante liu atu sai prioridade iha OJE 2023, inklui agrikultura ne'ebé orienta ba konsumsaun lokál, edukasaun, saúde, no bee mós no saneamentu. Hafoin Fundu Petrolíferu mamuk, sei la iha osan tan atu investe iha setór xave sira. Nune'e mak ita presiza uza oportunidade ida ne'e atu investe iha povu.

Iha Karta Aberta refere, ami mós identifika proposta programa balun ne'ebé ami konsidera la bele sai prioridade iha OJE 2023, inklui aeroportu regional sira no komponente Projetu Tasi Mane. Por ezemplu, ezbosu lei ida ne'e inklui "aquisição de terrenos e reassentamento da população", maibé Projetu Tasi Mane iha hela inserteza. La iha razaun atu aloka osan ba dezlokasaun comunidade se viabilidade projetu ne'e seidauk klaru. Presiza prioriza estudu independente kona ba kustu, benefísiu, no risku molok aloka osan tan ba implementasaun, hanesan ANPM no TimorGAP fó kometimentu atu realiza. Tuir mai, proposta Lei ida ne'e mós inklui estensaun auto-estrada iha Costa Súl ne'ebé liga ho Projetu Tasi Mane. Konstrusaun faze primeiru realiza ho kustu tokon \$350 ba 30 km de'it - ho qualidade ne'ebé la di'ak no daudaun ne'e kondisaun balu hahú aat ona. Se Governu propoin atu kontinua harii auto-estrada ida ne'e, karik kustu tomak bele to'o \$1.3 biliaun - maske estudu independente ba projetu ida ne'e seidauk hala'ó. Mosu dúvida boot, benefísiu saida mak sei fó ba povu, no oinsá mak impaktu ba sustentabilidade financeiru?

La'ó Hamutuk nia submisaun ne'e aneksu ba Komunikadu ida ne'e. La'ó Hamutuk konvida media sira atu kontaktu mai ami atu hetan klarifikasaun ka komentáriu liu tan kona ba asuntu importante ida ne'e. Bele hetan informasaun tan husi <https://www.laohamutuk.org/econ/OJE23/22OGE23.htm#MOP>.

Obrigadu barak.